



TALWEG

13 / 03 / 2016 | ARZ, JIL DANIEL

An deiz-se e oa un devezh ordinal e bed an arzoù. E L'Endroit, un diskouezva bihan eus Roazhon gouestlet d'an oberennoù moulet, e veze lidet trede niverenn ur gazetenn arzel o tont eus Strasbourg. Homañ, anvet Talweg, a zo kenurzhiet gant ur strollad studierezed kozh eus skol an arzoù kinklañ : Pétrole éditions. Hag e-barzh pep niverenn e vez roet ur plas dieub d'un nebeud arzourien, dezho da implij ar plas-se evel ul lec'h nevez evit krouiñ.

En diskouezva e kaver ivez un nebeud oberennoù ouzh ar voger, ha levrioù graet gant arzourien, renket e arrebeuri al lec'h. D'un tu, an hini nevez bet kenmoulet gant L'endroit : Camp Catalog, un dastumadeg tresadennoù Jérémie Gindre. An arzour-mañ e oa bet lakaet ar gaoz war e benn e niverenn sizhunvezh gentañ miz Gouere ar bloaz tremenet pa 'n doa diskouezet e labour e kreizenn La Criée.

An noz-mañ e vo un daou-ugent den bennak o tremen da deurel ur sell d'ar gazetenn. Siwazh ne vo prenet hini ebet gant an dud o tremen. "Alies e vez lâret deomp eo re ger" a lâr Audrey. Ha setu an dalc'h, tro 25 € koust ar skouerenn. Met pa komprenner penaos eo savet ar priz e komprenner un tamm gwelloc'h : ul lodenn a servij da baeañ ar mouller, ul lodenn da baeañ an dasparzher, un trede lodenn da baeañ ar gwerzher levrioù hag ar pezh a chom a servij da "baeañ" an arzourien hag ar yalc'hadoù bihan resevet gante a zo implijet da glokaat an dispignoù-se. Evel-just ne vez gounezet argant ebet gant skipailh ar gazetenn. Ha setu penaos e weler unan eus skoilhoù pennañ demokrateladur an arz a-vremañ, ar pezh a zo chalus pa ouier penaos eo ganet ar c'hoant ober levrioù ha kazetennoù gant an arzourien : reiñ an tu d'an dud paour da gaout oberennoù izel o friz.

Da skipailh Talweg d'en em c'houlenn bremañ petra eo ar pal pennañ : kaout ur gazetenn arzel evit ar re o deus un tamm argant pe kaout ur stumm all da voullañ labourioù an arzourien evit plijadur an holl ?